

Odgovor na stvarne potrebe građana

Petnaest godina nakon uspostavljanja Distrikta Brčko, institucije Distrikta rade, a građani uživaju veću sigurnost. Mnogi od njih vide određeni nivo prosperiteta i moramo nastaviti da radimo tako da osiguramo priliku za zaposlenje za sve građane Distrikta, rekao je danas visoki predstavnik Valentin Inzko, govoreći u Brčkom na manifestaciji obilježavanja godišnjice postojanja Distrikta.

“Zadatak koji se nalazi pred predstavnicima građana Brčkog – isti zadatak koji je i pred predstavnicima građana u cijeloj zemlji – povećati sadašnje uspjehe, kako bi životni standard mogao rasti brže i puno značajnije,” rekao je on.

Visoki predstavnik je rekao da uspjesi koji su u prošlosti postignuti u Brčkom pokazuju da je uspjeh moguć – i u Brčkom i u Bosni i Hercegovini – ali je dodao da su u posljednjih nekoliko godina reforme u Distriktu zaustavljene i da se mora ojačati opredjeljenje da se nastavi sa napretkom.

“Kao i ostatak zemlje, Distrikt se suočava sa stvarnim problemima. Ne moram nikoga podsjećati da je korupcija uvijek bila jedna od stvari koja najviše zabrinjava građane. A institucije Brčkog su imale različite rezultate u borbi protiv nje,” rekao je. “I uprkos činjenici da je Brčko uvijek imalo bolje ekonomske rezultate od ostatka zemlje – posebno kada je riječ o korištenju prednosti svoga položaja na Savi – nezadovoljstvo određenog broja građana lošim životnim standardom u poređenju sa susjednim zemljama ovdje je prisutno jednako kao i drugdje u Bosni i Hercegovini.”

Visoki predstavnik također je tražio promjenu u političkom pristupu.

“U prošlosti, Brčko je često služilo kao primjer šta se može

uraditi u ovoj zemlji kada se izazovima koji se čine skoro nepremostivim pristupi maštovito i odlučno," rekao je. "Institucije koje su stvorene u Distriktu Brčko omogućile su rješavanje strateških izazova na načine koji su i praktični i efikasni – te se tako odgovorilo na stvarne potrebe građana. To nije loš model za ostatak zemlje, sve dok političke partije budu radile zajedno da učine život boljim za sve stanovnike Distrikta. Posebno danas, kada – više nego ikada – postoji jasna i goruća potreba za novim političkim idejama."

Kompletan tekst govora visokog predstavnika možete naći na web-stranici OHR-a.